



Ang Doktrina Sa Mga Nicolaita

ni

Rev. William Marrion Branham

Ang Doktrina Sa Mga Nicolaita

Pinadayag 2:15, “Maingon man anaa usab kanimo ang pipila nga nanagsunod sa tulooan sa mga Nicolaita, nga mao kining butang nga akong gidumtan.”

Inyong mahinumdoman nga naipahayag ko na diha sa Kapanahunan sa Efeso nga ang pulong, *Nicolaita*, nagagikan sa duha ka mga pulong sa Griyego: *Nikao* nga ang buot ipasabot mao ang *pagpanaug*, ug ang *Lao* nga ang buot ipasabot *mga yanong tawo sa iglesia*. Ang kahulogan sa Nicolaita, “*ang pagpanaug sa mga yanong tawo sa iglesia*.” Karon ngano man kini ingon nga makalilisang nga butang? Makalilisang kini tungod kay wala sukad sa Dios gisalig ang Iyang iglesia sa mga kamot sa usa ka binoto nga kapangulohan nga nagalihok nga may politikanhong panghunahuna. Iyang gisalig ang Iyang iglesia diha sa pag-amuma sa mga ordinado-sa-Dios, puno-sa-Espiritu, mga tawo nga nagkinabuhi-sa-Pulong nga maoy nagaagak sa mga tawo pinaagi sa pagpakaon kanila sa Pulong. Wala gayud Niya gipanglain ang mga tawo ngadto sa nagkalainlaing mga klase aron nga ang kadaghanan pangunahan sa usa ka balaan nga kaparian. Tinuod nga ang kapangulohan kinahanglan nga balaan, apan maingon man usab ang tibuok kongregasyon. Labot pa, wala gayuy bahin diha sa Pulong diin ang mga pari o ang mga ministro o ingon niana nagapataliwala tali sa Dios ug sa mga tawo, ni adunay dapit nga diin sila gilain sa ilang pagsimba sa Ginoo. Gusto sa Dios nga higugmaon ug alagaran Siya sa tanan. Ginaguba sa Nicolaitanismo kanang maong mga lagda ug hinoon gipanglain ang mga ministro gikan sa katawhan ug ginahimo ang mga mag-aagak nga mga magmamando imbis nga mga alagad. Karon kining maong doktrina sa pagkatinuod nagsugod ingon nga usa ka buhat diha sa unang kapanahunan. Ang problema daw sa nagapahinungod sa duha ka pinulongan: “mga anciano” (mga presbyter) ug “mga magbabantay” (mga obispo). Bisan tuod nga ang Kasulatan nagapakita nga adunay pipila ka mga anciano diha sa matag iglesia, ang pipila nagsugod (si Ignatius usa kanila) sa pagpanudlo nga ang panahum mahitungod sa pagka-obispo mao ang pagkalabaw o ang kagahum ug kamandoan labaw sa mga anciano. Karon ang tinuod niini nga ang pulong “anciano” nagakahulogan kung kinsa ang maong lalaki, samtang ang pulong “obispo” nagakahulogan sa opisina

sa mao rang lalaki. Ang maong anciano mao ang mismong lalaki. Obispo ang opisina sa maong lalaki. “Ang anciano” sa una pa ug sa kanunay magapahinungod ngadto sa pagkahamtong sa tawo diha sa Ginoo. Siya’y anciano, dili tungod kay siya giboto o giordenahan, ug uban pa., kondili tungod kay siya usa ka MAS HAMTONG. Usa siya ka mas hingkod, binansay, dili usa ka bag-o pa, kasaligan tungod sa kasinatian na ug napamatud-an na sa hataas nga panahon diha sa iyang Cristohanong kasinatian. Apan dili, ang maong mga obispo wala gayud mipabilin sa mga sinulat ni Pablo, kondili sila hinoon ningdangop ngadto sa gisaysay ni Pablo niadtong higayon nga iyang gipatawag ang mga anciano gikan sa Efeso paadto sa Mileto diha sa Mga Buhat 20. Gipahayag diha sa bersikulo 17 nga, “mga anciano” ang pagtawag ug dayon sa bersikulo 28 gitawag sila nga mga magbabantay (mga obispo). Ug kining mga obispo, (sa walay pagduhaduha politikanhon ang panghunahuna ug matinguhaon sa gahum) namugos gayud nga gihatagan ug kahulugan kuno ni Pablo nga “ang mga magbabantay” mas labaw pa kay sa local nga anciano nga may opisyal nga katungdanan lamang diha sa iyang kaugalingong iglesia. Alang kanila ang usa ka obispo mao na karon ang adunay malapad nga kagahum ibabaw sa daghang lokal nga mga lider. Ang ingon niana nga hunahuna dili uyon sa Kasulatan ni sa kasaysayan man, bisan pa gani ang usa ka tawo nga diha sa hataas nga kahimtang nga si Policarpio mipaling ngadto sa ingon nianang organisasyon. Mao nga, kadtong nagsugod ingon nga usa ka buhat niadtong unang kapanahunan gihimo na nga usa ka literal nga doktrina ug mao pud niini karon. Ang mga obispo nagaangkon sa gihapon ug gahum sa pagkontrol sa mga tawo ug pakig-angayan sila subay sa ilang gusto, ginapahimutang sila sa diin kung unsa may ilang kabubut-on diha sa ministerio. Ginasalikway niini ang kapangulohan sa Balaang Espiritu Nga nag-ingon, “Igahin Kanako si Pablo ug Barnabas alang sa bulohaton nga niini gitawag Ko sila.” Kini supak-sa-Pulong ug anti-Cristo. Mateo 20:25-28, “Apan gitawag sila ni Jesus ngadto Kaniya, ug miingon, Kamo nasayod nga ang mga punoan sa mga Gentil nanagpakaagalon ngadto kanila, ug ang ilang mga kadagkuan nagapakahari ngadto kanila. *Apan kini dili mahitabo kaninyo*; hinonoa bisan kinsay gustong magdaku kaninyo, kinahanglan ma-inyo siyang sulogoon; ug bisan kinsa kaninyo nga buot magapangulo kaninyo, kinahanglan ma-inyo siyang ulipon: Maingon nga ang Anak sa tawo mianhi dili aron

siya pag-alagaron, kondili sa pag-alagad, ug sa paghatag sa Iyang kinabuhi ingon nga lukat alang sa daghan.” Mateo 23:8-9, “Apan ayaw kamo pagpatawag nga Rabi: kay kamo adunay Usa lamang ka Magtutudlo, nga mao si Cristo; ug kamong tanan nga magsoon. Ug walay bisan kinsang tawo nga inyong pagatawgon nga amahan dinhi sa yuta: kay kamo adunay Usa lamang ka Amahan, Nga anaa sa langit.”

Aron sa pagpatin-aw pa niini, tugoti kong isaysay ang Nicolaitanismo sa niining paagi. Inyong mahinumduman nga sa Pinadayag 13:3 nagaingon kini, “Ug sa iyang mga ulo daw may samad nga ikamatay: apan naayo ang iyang samad nga ikamatay: ug ang mga tawo sa tibuok yuta sa kahibulong minunot sa mapintas nga mananap.” Karon atong nasayran nga ang nasamaran nga ulo mao ang pagano nga Romanong Emperyo, kadtong dakung gahum pang-politika sa kalibutan. Kining maong ulo mingbangon pag-usab ingon nga “Romanong Katoliko nga emperyong espirituwal.” Karon himatikdi kini ug maayo. Unsa may gihimo sa pang-politika nga paganong Roma nga maoy nahimong basihan sa iyang paglampos? Iyang, “gibahinbahin ug gipangdaug.” Mao kadto ang binhi sa Roma—ang mangbahinbahin ug mangdaug. Ang iyang mga ngipon nga puthaw mingkuniskunis ug minglamoy. Kadtong iyang mga kinuniskunis ug gilamoy dili na gayud makabangon pag-usab maingon nga sa iyang paglaglag sa Carthage ug gikatag siya ingon sa asin. Ang mao ra nga binhing puthaw nagpabilin diha kaniya sa dihang mitungha siyang ingon nga mini nga iglesia, ug ang iyang pamaagi nagpabiling mao ra gihapon—mangbahinbahin ug mangdaug. Mao kana ang Nicolaitanismo ug ginadumtan kini sa Dios.

Karon usa kini ka inila na nga masaysayong kamatuoran nga sa diha kining maong sayup hinayhinay misulod sa iglesia, ang mga kalalaken-an mingsugod sa pagpakig-indigay alang sa opisina sa pagka-obispo nga ang resulta mao nga kining posisyon gikahatag ngadto sa mga kalalaken-an nga mas labaw’ng edukado ug malambon sa materyal ug politikanhon ang panghunahuna. Ang tawhanong kahibalo ug mga programa mao na’y mingsugod sa pagpuli sa dapit sa Langitnong kaalam ug ang Balaang Espiritu dili na ang nagdumala. Usa gayud kadto ka makalilisang nga pagkadautan, kay gisugdan na nga huptan sa mga obispo nga wala na gikinahanglan niini ang usa ka dayag nga Cristohanong kinaiya

sa pagdumala sa mga buluhaton sa Pulong o ang mga seremonya sa simbahan kay ang mga elemento ug ang mga seremonya mao na'y gihataga'g bili. Gitugotan niini ang mga tawong dautan (mga tigpahisalaag) nga bungkagon ang panon.

Tungod sa hinimo'g-tawo nga doktrina sa pagpataas sa mga obispo ngadto sa dapit nga wala man gihatag kanila diha sa Kasulatan, ang sunod nga lakang mao ang paghatag na sa hinirango nga mga titulo paingon ngadto sa usa ka pang-relihiyon nga herarkiya; kay wala madugay duna nay mga arsobispo nga labaw sa mga obispo ug mga cardinal nga labaw sa mga arsobispo ug diha sa panahon na ni Boniface III aduna nay usa ka papa nga pinakalabaw sa tanan, usa ka *Pontipise*.

Tungod sa Nicolaita nga doktrina ug ang pagsagol sa Cristianismo sa Babilonianismo ang gisangputan sa tanan mao gayud kon unsa ang nakita ni Ezequiel sa Kapitulo 8:10, “Busa misulod ug nakita ko; ug ania karon ang tanan nga dagway sa mga butang nga nagakamang, ug mga mananap nga dulumtanan, ug ang tanang mga diosdios sa balay sa Israel, gipasundayag paglibut diha sa kuta. Pinadayag 18:2, “Ug siya misinggit sa makusog, nga tingog nga nag-ingon, nagun-ob, nagun-ob ang bantugang Babilonia, ug nahimo na siyang puloy-anan sa mga yawa, ug tagoanan sa tanang mahugaw'ng espiritu, ug tagoanan sa tanang langgam nga mahugaw ug dulomtan, kay ang tanang kanasuran nanagpakainom sa bino sa iyang mahugaw'ng kaulag.”

Karon kining Nicolaita nga doktrina, kining kalagdaan nga natukod na diha sa iglesia wala nagmalamposon gayud sa daghang mga tawo kay mabasa sa mga niini ang talagsaong sinulat o salaysay bahin sa Pulong nga gisulat sa kung kinsa man nga diosnong tawo. Busa unsa ma'y gibuhat sa maong iglesia? Gipalagpot niini ang matarung nga mga magtutudlo ug gisunog ang mga basahong linukot. Nanag-ingon sila, “Gikinahanglan niini ang usa ka pinasahing pagtuon aron nga mabasa ug masabtan ang Pulong. Aba bisan gani si Pedro nag-ingon nga daghan sa mga sinulat ni Pablo ang malisod sabton.” Human nga gikuha na palayo ang Pulong gikan sa mga tawo, sa wala madugay ang mga tawo nanagpatalinghug na lamang sa kon unsa ma'y isulti sa mga pari, ug ginabuhat ang kon unsa ma'y iyang giingon kanila. Ilang gipanagtawag kadto nga mao ang Dios ug ang Iyang balaanong

Pulong. Ila nang giharian ang mga hunahuna ug kinabuhi sa mga tawo ug gihimo na silang mga ulipon sa usa ka malupigon nga kaparian.

Karon kon gusto ninyo ang kapanghimatuoran nga ginapugos sa Katolikong Iglesia ang pag-angkon sa mga kinabuhi ug mga panghunahuna sa mga tawo, paminawa lang ang mga balaod ni Theodosius X. *Ang Unang Balaod Ni Theodosius*.

Kining maong balaod gipagawas dayon human nga siya gibautismohan sa Unang Iglesia sa Roma. “Pagbuot namong tulo ka mga emperador nga sa makanunayon ang among mga sakup magpabilin nga nagadapig sa relihiyon nga gikatudlo na ni San Pedro ngadto sa mga Romano, nga madapigong giampingan pinaagi sa tradisyon ug karon ginapahayag sa papa nga, si Damaso sa Roma, ug ni Pedro, nga obispo sa Alexandria, usa ka lalaki nga may Apostolikanhong pagkabalaan sumala sa katukuran sa mga Apostoles, ug sa doktrina sa Ebanghelyo; nga toohan nato ang usa ka Pagkadios sa Amahan, sa Anak, ug sa Balaang Espirito, nga adunay parehong kahalangdon diha sa Balaanong Trinidad. *Ginamandoan namo nga ang mga dumadapig sa niining pagtuloohan pagatawgon nga mga Cristohanong Katoliko; among ginatawag ang tanan nga walay-alamag nga mga sumusunod sa uban nga mga relihiyon diha sa makaulaw’ng tawag nga mga erehes, ug ginadid-an ang ilang katiguman nga pagatawgon ug mga iglesia.* Walay labot ang pagpahamtang sa silot nga langitnong hustisya, malauman nila gayud ang mabug-at nga silot nga hunahunaon sa among kagamhanan, nga gikagiyahan pinaagi sa langitnong kaalam nga angay isilot. . . .”

Ang kinse ka mga panilot nga balaod nga gipagula niining emperador sulod sa ingon kadaghang mga katuigan nagwagtang sa mga katungod sa mga magtotoo sa doktrina sa ebanghelyo sa paggamit sa ilang relihiyon, dili sila gilakip sa tanan nga mga katungdanang sibil, ug gihulga sila sa mga multa, sa mga pag-imbargo, sa pagpaabog ug bisan sa pipila ka mga higayon, kamatayon.

Nahibalo ba kamo kung ngano? Paingon na kita mismo sa ingon niana karon.

Ang Iglesiang Romanong Katoliko nagatawag sa iyang kaugalingon nga Inahang iglesia. Ginatawag niya ang iyang

kaugalingon nga mao ang una o ang orihinal nga iglesia. Husto gayud kana sa tinuod. Siya kadtong maong orihinal nga Unang Iglesia sa Roma nga mibalik sa naandang kadautan ug miadto sa pagpakasala. Siya mao kadto ang una nga nag-organisa. Diha kaniya nakaplagan ang maong mga buhat ug dayon ang doktrina sa Nicolaitanismo. Wala ni usa nga molimod nga siya usa ka inahan. Usa siya ka inahan ug nanganak ug mga anak nga mga babaye. Karon ang usa ka anak nga babaye nagagawas sa usa ka babaye. Usa ka babayeng nagbisti'g mapula nga nagalingkod ibabaw sa pito ka mga bungtod sa Roma. Usa siya ka bigaon ug nanganak sa mga anak nga babaye. Kadtong mga anak nga babaye mao ang Protestante nga mga kaiglesiahanan nga minggawas gikan kaniya ug mingbalik mismo ngadto sa organisasyon ug Nicolaitanismo. Kining maong Inahan sa babayeng anak nga mga kaiglesiahanan gitawag nga bigaon. Kana mao ang babayeng dili matinud-anon sa iyang saad sa kaminyoon. Naminyo na siya sa Dios ug dayon mibiya sa pagpakighilawas sa yawa ug sa iyang pagpakighilawas nanganak siya ug anak nga mga babaye nga susama gayud kaniya. Kining panagduyog sa inahan ug anak nga babaye kasupak-sa-Pulong, kasupak-sa-Espiritu ug sa kasangputan anti-Cristo. Oo, ANTICRISTO.

Karon sa dili pa ako makapalayo ug ayo buot kong isulti nga kining nag-unang mga obispo nagdahum nga sila labaw pa kaysa sa Pulong. Ilang giingnan ang mga tawo nga mahimo nilang pasayloon ang ilang mga sala diha sa pagpangumpisal sa kadtong mga sala. Dili gayud kana ang kamatuoran. Gisugdan nila ang pagpangbautismo sa mga masuso kaniadto sa nanglabay nga ikaduha ka gatusan ka tuig. Sa pagkatinuod ilang gihimo ang pagbautismo alang sa pagbag-o sa kinabuhi. Dili ikahibulong nga nanaglibog na ang mga tawo karon. Kon nanaglibog na sila kaniadto, nga haduol kaayo sa Pentecostes, karon anaa sila sa makuyaw na kaayo nga kahimtang, ingon nga mga duha na kalibo ka mga katuigan ang pagkahilayo niini gikan sa orihinal nga kamatuoran.

Oh, Iglesia sa Dios, adunay usa lamang ka paglaum. Balik ngadto sa Pulong ug pagpabilin diha niini.

ANG DOKTRINA NI BALAAM

Pinadayag 2:14, “Anaa diha kanimo ang pipila nga nanagsunod sa mga pagtulon-an ni Balaam nga mao ang nagtudlo kang Balak

sa pagbutang ug kapangdolan sa atubangan sa mga anak sa Israel, sa pagkaon sa mga hinalad ngadto sa mga diosdios, ug sa paghimo'g pakighilawas.”

Karon dili n'yo mahimong magkaadunay sistemang Nicolaitanismo sulod sa iglesia ug nga dili mapasulod kining usa pa ka doktrina, usab. Makita ninyo, kon inyong kuhaon ang Pulong sa Dios ug ang pagpanglihok sa espiritu ingon nga maoy pamaagi sa pagsimba (“sila nga magasimba Kanako kinahanglan managsimba Kanako diha sa Espiritu ug sa kamatuoran”) sa ingon niana inyong kinahanglan hatagan ang mga tawo ug laing usa pa ka porma sa pagsimba ingon nga kapuli, ug ang maong pagpuli nagakahulogang Balaamismo.

Kung atong pagasabton kung unsa ang doktrina ni Balaam diha sa iglesia sa Bag-ong Tugon maayo pa kinahanglan nga atong balikan ug susihon kon unsa kini kaniadto sa iglesia sa Daang Tugon ug i-aplikar kini ngadto nianang ikatulong kapanahunan ug dayon dad-on kini sa karong panahon.

Ang maong estorya makaplagan diha sa Numeros Kapitulo 22 ngadto sa 25. Karon nasayod kita nga ang Israel mao ang katawhan nga pinili sa Dios. Sila kaniadto ang mga Pentecostal sa ilang mga adlaw. Nagpasilong sila ilalum sa dugo, gikabautismohan silang tanan diha sa Dagat nga Mapula ug nanghaw-as sila gikan sa mga tubig, nga nanag-awit diha sa Espiritu ug nanagsayaw ilalum sa kusog sa Espiritu Santo, samtang si Miriam, ang babayeng propeta, mitambol sa iyang tamburin. Bueno, human sa usa ka panahon sa pagpanaw, kining mga anak sa Israel miabot sa Moab. Nahinumduman ninyo kon kinsa si Moab. Siya ang anak nga lalaki ni Lot sa usa sa iyang kaugalingong mga anak nga babaye, ug si Lot usab pag-umangkon ni Abraham, busa kabanay ang Israel ug ang Moab. Gusto kong makita ninyo kana. Ang maong mga Moabitanhon nasayod sa kamatuoran, kung nagkinabuhi man sila niini o dili.

Busa ang Israel nakaabot ngadto sa mga utlanan sa Moab ug nagpadala sa mga mensahero ngadto sa hari nga nagaingon, “Managsoon kita. Tugoti kami nga moagi sa inyong yuta. Kon ang among mga katawhan man o ang among mga kahayupan makakaon o makainum ug bisan unsa, malipayon kaming mobayad alang niini.” Apan si Haring Balak nakulbaan kaayo. Kadtong pangulo sa hugpong sa mga Nicolaita dili andam nga tugotang

moagi ang maong iglesia nga ginasundan sa mga ilhanan ug mga katingalahan ug mga nagkalainlaing pagpadayag sa Espiritu Santo, nga ang ilang mga dagway nga nagasanag diha sa himaya sa Dios. Makuyaw kadto kaayo, kay basin mawad-an siya sa pipila sa iyang mga tawo. Busa mibalibad si Balak sa pagpaagi sa Israel. Sa pagkatinuod, daku kaayo ang iyang pagkahadlok kanila, nga midangop siya sa usa ka suholanan nga propeta nga ginganlan ug Balaam ug gihangyo siya sa pagpataliwala tali kaniya ug sa Dios ug hangyoon ang Makagagahum-sa-Tanan nga tunglohon ang Israel, ug himoon silang walay-kusog. Ug si Balaam, ingon nga matinguhaon sa pagsalmot sa politikanhong mga buluhaton ug nga mahimong inila nga tawo, malipayon lang kaayo nga buhaton kini. Apan ingon nga nakita niyang kinahanglan pang iduol ngadto, ug magkaadunay pagpakigkita sa Dios aron matunglo ang maong katawhan, ingon nga dili niya mahimo kini sa iyang kaugalingon, miduol siya sa paghangyo sa Dios kon makuha niya ang Iyang pahanugot sa pag-adto. Karon dili ba kana ingon niana gayud ang mga Nicolaita nga aduna kita uban kanato karon? Ilang ginatunglo ang matag-usa nga dili mosubay sa ilang pamaagi.

Sa dihang naghangyo ug pahanugot si Balaam sa Dios sa pag-adto, wala siya tugoti sa Dios. Sus masakit kana! Apan si Balak mapugsanon, nga nagasaad kaniya sa mas dagku pang mga pahinungod ug kadungganan. Busa mibalik si Balaam ngadto sa Dios. Karon ang usa ka tubag gikan sa Dios igo na unta gayud. Apan dili alang sa gahi'g ulo nga si Balaam. Sa dihang nakita sa Dios ang iyang pagkamasupakon, Iyang gisultihan siya sa pagtindog ug sa paglakaw. Sa madali iyang gisangunan ang asno ug palayo siya nga mipaingon. Iya untang napamalandongan nga usa kadto ka gipahanugot lamang nga kabubut-on sa Dios ug dili gayud niya mahimong tunglohon sila bisan kon sa baynte ka pilo pa siya moadto ug gisulayan sa baynte pa kapilo. Daw sa unsa ka pareho kang Balaam ang mga tawo karon! Nagatoo sila sa tulo ka mga Dios, nagpabautismo diha sa tulo ka mga titulo imbis sa maong NGALAN, ug ipadala sa Dios sa gihapon ang Espiritu diha kanila sama sa Iyang gihimo diha kang Balaam, ug mopadayon silang nagatoo nga ensakto gayud sila, ug ania lage sila karon nga tinuod gayud nga mga Balaamista. Kita n'yo, ang maong doktrina ni Balaam. Sige padayon ka lang sa gihapon. Buhata kini diha sa imong pamaagi. Moingon pa sila, “Bueno, gipanalanginan man

kami sa Dios. Siguro maayo man kini.” Nasayod akong Iya kamong gipanalanginan. Dili ko ikalimud kana. Apan kini ang mao ra gihapon nga pang-organisasyong dalanon nga gilakwan ni Balaam. Pagsukol kini ngadto sa Pulong sa Dios. Mini kini nga pagtulon-an.

Busa si Balaam walay pugong nga mipaingon didto hangtud ang usa ka manulonda nga gikan sa Dios nagpahaluna diha sa iyang dalan. Apan kadto nga propeta (obispo, cardinal, ang tigpangulo sa tigum, presidente ug pangkadaghanang tigdumala) nahimong buta kaayo sa Espirituhanong mga butang tungod sa paghunahuna sa kadungganang ug kahimaya ug salapi nga dili na niya makita ang manulonda nga nagatindog nga may linaas nga espada. Didto siya nagtindog aron pugngan ang buangbuang nga propeta. Nakita siya sa gamay’ng asno ug milikay nga pabalik-balik hangtud sa kaulahian naipiit niya ang tiil ni Balaam sa paril nga bato. Mihunong ang asno ug dili na mopadayon. Dili na niya mahimo nga mopadayon. Busa mikanaug si Balaam ug gisugdan siya sa pagbunal. Dayon ang asno misugod sa pagsulti ngadto kang Balaam. Gipasulti’g mga dila sa Dios ang asno. Dili hybrid kadtong maong asno; orihinal siya nga binhi. Miingon siya sa binutahan nga propeta, “Dili ba ako ang imong asno, ug diha sa pagka-matinumanon wala ko ba ikaw pasakya hangtud karon?” Mitubag si Balaam, “Oo, oo, ikaw mao ang akong asno ug sa pagkamatinumanon gipasakay mo ako hangtud karon; ug kung dili ta ka mapalakaw, patyon ta ka. . . Ay! unsa man kini, nakig-estorya sa usa ka asno? Kataw-anan kana, sa pagdahum ko akong nadungog ang asno nga nakig-estorya ug ginatubag ko usab kini.”

Ang Dios sa una pa nagsulti na diha sa usa ka pinulongan. Nagsulti Siya sa kumbira ni Belsasar ug dayon sa Pentecostes. Ginabuhat Niya kini pag-usab karon. Usa kini ka pasidaan sa umalabot na nga paghukom.

Dayon ang manulonda nahimong makita na ni Balaam. Iyang gisultihan si Balaam nga dili pa tungod sa asno patay na unta siya bisan karon sa pagsupak sa Dios. Apan sa dihang nanaad na si Balaam nga mobalik na, gisugo siya pabalik nga may pahimangno nga isulti lamang kon unsa ang gihatag sa Dios kaniya.

Busa si Balaam mibalik didto ug nagtukod ug pito ka halaran alang sa mahinlong halad nga mga mananap. Nagpatay siya ug usa ka lakeng carnero nga nagapaila sa pag-abot sa Mesiyas. Nahibalo

siya kon unsa ang buhaton sa pagduol ngadto sa Dios. Anaa kaniya ang husto gayud nga mechanics; apan dili ang dynamics; mao man pud karon. Dili ba ninyo makita kini, mga Nicolaita? Atua ang Israel didto sa walog, ginahalad ang mao gihapong halad, ginabuhat ang mao rang mga butang, apan usa lamang ang adunay mga ilhanan nga naganunot. Usa lamang ang adunay Dios sa ilang taliwala. Ang porma dili makadala kaninyo sa bisan asa. Dili niini mapulihan ang dapit sa pagpadayag sa Espiritu. Mao kini ang kon unsay nahitabo sa Nicaea. Ilang gipatigbabaw ang doktrina ni Balaam, dili ang doktrina sa Dios. Ug sila nangapangdol; oo sila nangalaglag. Nangahimo silang mga tawong patay na.

Human nga nahimo na ang halad, andam na si Balaam sa pagpropesiya. Apan gibaligto sa Dios ang iyang dila ug dili niya matunglo sila. Gipanalanginan niya sila.

Napungot ug maayo si Balak, apan walay mahimo si Balaam bahin sa maong propesiya. Naisulti na kadto sa Espiritu Santo. Busa gisultihan ni Balak si Balaam nga molugsong didto, ngadto sa walog, ug tan-awon ang ilang luyong mga bahin aron makita kung aduna bay paagi nga tingali mahimo niyang tunglohon sila. Ang mga taktika nga gigamit ni Balak mao gihapong mga taktika nga ilang ginagamit karon. Ginapakaubos sa dagkung mga denominasyon ang gagmay'ng mga pundok, ug ang bisan unsa nga ilang makita sa taliwala kanila nga mahimong usa ka kaulawan ilang ipagawas kini ug ibandilyo kini. Kon ang mga maka-moderno nagakinabuhi diha sa kasal-anan, walay bisan usa ang nagasulti bahin niini; apan ang usa sa mga pinili gani mahilambigit diha sa kagubot ug batikuson kini dayon sa matag pamantalaan sa tibuok nasud. Oo, ang Israel aduna siya'y iyang luyo (karnal) nga mga bahin. Adunay bahin diha kanila nga dili dalayegon; apan bisan pa diha sa ilang mga kakulangan, pinaagi sa katuyoan sa Dios nga nagapamuhat diha sa pagpili, pinaagi sa grasya ug dili pinaagi sa mga buhat, ANAA KANILA ANG PANGANOD SA PANAHON SA ADLAW UG HALIGING KALAYO SA PANAHON SA KAGABHION, ANAA KANILA ANG BINUNALAN NGA BATO, ANG BITIN NGA TUMBAGA UG ANG MGA ILHANAN UG MGA KATINGALAHAN. Mga gipanghimatud-an sila—dili sa ilang kaugalingon, kondili diha sa Dios.

Ang Dios wala bisan unsay pagtamud alang niadtong mga Nicolaita nga adunay ilang mga PHD, LLD ug mga DD ug sa tanan

na nila nga maayong mga organisasyon ug sa pinakamaayo na nga mahimong ipasigarbo sa tawo; apan aduna gayud Siya’y pagtamud ngadto sa Israel kay aduna kanila ang Pulong nga ginanghimatud-an sa taliwala kanila. Siguradong dili gayud pinasinaw kon tanawon ang Israel, nga bag-ohay pa lang nakagawas sa Ehipto diha sa hinanali nga pagbiya, apan bisan sa unsa pa siya usa ka gipanalanginan nga katawhan. Ang iya lang gayud nahibaloan sulod sa tulo ka gatus ka mga katuigan mao ang pagbantay sa kahayupan, ang pag-atiman sa kaumahan ug ang pagpaulipon sa kahadlok sa kamatayon ilalum sa mga Ehiptohanon. Apan nakalingkawas na siya karon. Usa siya ka gipanalanginan nga katawhan pinaagi sa labaw’ng kamandoan sa Dios. Siguradong gipakaubos siya sa Moab. Ang tanang uban pang mga nasud naghimo niini, usab. Ginapakaubos kanunay sa organisasyon ang mga dili-naorganisa, ug bisan hain niini, pinaagi sa determinasyon, pagadad-on sila pasulod sa organisasyon o bungkagon sila kon dili sila mouban.

Karon tingali adunay mangutana kanako, “Igsoong Branham, unsa man ang nakapahunahuna kanimo nga ang Moab naorganisa samtang ang Israel wala? Diin mo man nakuha kana nga ideya?” Akong nakuha kini mismo dinhi sa Biblia. Na-tipo kini tanan dinhi. Ang tanan nga nahisulat diha sa Daang Tugon nga anaa diha sa porma sa estorya nahisulat alang sa pagpahimangno kanato aron nga makakat-on kita niini. Ania kini mismo dinhi sa Numeros 23:9, “Gikan sa kinatumyan sa mga kapangpangan nakita ko siya, ug gikan sa mga kabungtoran gitan-aw ko siya; ania karon kana maoy usa ka katawhan nga nagpuyo nga NAG-INUSARA, ug dili PAGAISIPON UBAN SA MGA NASUD.” Mao kana. Ang Dios nga nagalantaw sa ubos gikan sa ibabaw sa mga bato, dili sa kung unsay walog nga ginapangita ang ilang mga sayup nga kinaiya ug ginahukman sila. Ginalantaw sila sa Dios sa paagi nga gusto Niyang lantawon sila—gikan sa maong kinatas-an sa gugma ug kalooy. Nagpuyo sila nga NAG-INUSARA ug wala sila naorganisa. Wala sila’y hari. Anaa sila’y propeta, ug ang propeta adunay Dios nga diha kaniya pinaagi sa Espiritu; ug ang Pulong miabot ngadto sa propeta ug midangat sa mga tawo ang Pulong. Wala sila nahisakop sa U.N.. Wala sila nailalum sa World Council of Churches, ngadto sa mga Baptist, mga Presbyterian, Assembly of God o unsa pa mang grupo. Dili na nila kinahanglan nga

mahisakup pa. Nahiusa na sila sa Dios. Wala na nila kinahanglana ang mga tambag gikan sa bisan unsang konseho—anaa kanila ang “Mao kini ang ginaingon sa Ginoo” sa ilang taliwala. Aleluya!

Karon bisan pa sa kamatuoran nga si Balaam nasayod sa hustong pamaagi sa pagduol sa Dios ug nga makapagawas ug pinadayag gikan sa Ginoo pinaagi sa usa ka pinasahing gasa sa gahum, siya sa gihapon, bisan sa tanan pa niini, usa ka obispo sa mini nga grupo. Kay unsa man ang iyang gibuhat karon aron nga maangkon ang pagtamod ni Balak? Naghan-ay siya’g usa ka plano diin mapugos gayud ang Dios sa pagtagad sa Israel ngadto sa kamatayon. Maingon gayud sa nahibaw-an na ni Satanas nga malimbongan niya si Eva (nga maihulog siya diha sa unodnong sala) nga sa ingon nga hinungdan nahipagawas sa Dios ang Iyang pagpahamtang sa silot nga kamatayon batok sa sala, busa nasayod si Balaam nga kon iyang makuha ang Israel sa pagpakasala, gikinahanglan sa Dios nga tagdon sila ngadto diha sa kamatayon. Busa nagplano siya ug pamaagi aron mapaduyog niya sila ug sa pagpaipon sa sala. Nagpadala siya ug mga pagdapit aron moadto sa pista ni Baal-peor (panganhi kamo ug magsimba uban kanamo). Karon ang Israel, sa walay duhaduha, nakakita na sa mga pista sa mga Ehiptohanon busa wala nila nabati nga sayup kadto kaayo ang pag-adto ug ang paglantaw lang ug tingali ang pagpangaon uban sa maong mga tawo. (Unsa may sayup diha sa pagpakig-uban diay? Angay man nga ato silang higugmaon, dili ba, o unsaon man nato sa pagkabig kanila?) Ang pagkamahigalaon wala man gayud nakapasakit sa kang bisan kinsa—o maoy ilang pagdahum. Apan sa diha nga ang kadtong seksing mga Moabitanhong kababayen-an misugod na sa pagsayaw ug nanghubo samtang sila nagtuyok-tuyok nga ginahimo ang ilang rock and roll ug twist, miabot ang kaulag diha sa mga Israelinhon ug nangadani sila ngadto sa pagpanapaw, ug ang Dios diha sa kapungot mipatay sa kwarentay-dos kalibu kanila.

Ug mao kana kon unsa ang gibuhat ni Constantine ug gibuhat sa iyang mga manunod sa Nicaea ug human sa Nicaea. Ilang gipangdapit ang mga tawo sa Dios ngadto sa maong kombensyon. Ug sa diha nga ang iglesia nanglingkod na aron kumaon, ug mitindog aron makigdula (pagpakigduyog sa porma nga pang-iglesia, mga seremonyas, ug paganong mga kapistahan nga ginganlan subay sa mga tulumanong Cristohanon), siya’y nalit-ag; nakahimo na siya ug pagpakighilawas. Ug mibiya ang Dios.

Sa diha nga talikdan na ni bisan kinsang tawo ang Pulong sa Dios ug mopasakup sa usa ka iglesia imbis nga dawaton ang Espiritu Santo, kanang tawhana mamatay. Patay na! Mao kana kon unsa siya. Ayaw pagpasakup sa usa ka iglesia. Ayaw gayud sudli ang organisasyon ug maapil sa mga kredo ug tradisyon o bisan unsa nga ginakuha ang dapit sa Pulong ug Espiritu, o ikaw patay na. Tapus na ang tanan. Patay ka na. Nahimulag na sa walay kinutuban gikan sa Dios!

Mao kana kon unsay nahitabo sa matag kapanahunan sukad pa kaniadto. Ginaluwas sa Dios ang mga tawo. Nanggawas sila pinaagi sa dugo, gibalaan pinaagi sa Pulong, nagalakaw sa tubig sa bautismo ug napuno sa Espiritu; apan pagkahuman sa pipila ka panahon ang unang gugma nagakabugnaw ug adunay nakahunahuna nga angay silang mag-organisa aron mapanalipdan ang ilang mga kaugalingon ug mapasidunggan ang ilang mga ngalan, ug giorganisa usab nila ang ilang kaugalingon pag-abot sa ikaduha nga henerasyon ug usahay bisan sa wala pa gani niadto ang maong panahon. Wala na kanila ang Espiritu sa Dios, usa na lang ka porma sa pagsimba. Sila mga patay na. Ilang gipang-hybrid ang ilang mga kaugalingon pinaagi sa kredo ug sa porma ug wala na'y kinabuhi diha kanila.

Mao nga nadani ni Balaam ang Israel sa paghimo ug pagpakighilawas. Nasayod ba kamo nga ang lawasnong pagpakighilawas mao ra gayud nga espiritu nga anaa diha sa organisadong relihiyon? Ang giingon ko nga ang espiritu sa pagpakighilawas mao ang espiritu sa organisasyon. Ug ang tanan nga mga makighilawason magkaaduna sila'y bahin sa linaw nga kalayo. Mao kana sa kon unsa ang hunahuna sa Dios mahitungod sa organisasyon. Oo sir, ang babayeng bigaon ug ang iyang mga anak nga babaye mahiadto gayud sa linaw nga kalayo.

Ang mga denominasyon dili iya sa Dios. Dili gayud sila ingon niana kaniadto ug dili gayud mamahimo sa umalabot. Usa ka dautan nga espiritu ang nagabulagbulag sa mga tawo sa Dios ngadto sa herarkiya ug ngadto sa mga yanong tawo; ug kini, busa, usa ka dautan nga espiritu nga nagabulagbulag sa mga tawo. Mao kana kon unsa ang ginabuhay sa organisasyon ug mga denominasyon. Diha sa pag-organisa ilang ginahimulag ang ilang kaugalingon gikan sa Pulong sa Dios, ug ginadala ang ilang kaugalingon ngadto sa spirituhanong pagpanapaw.

Karon himatikdi nga naghatag si Constantine sa espesyal nga mga kapistahan ngadto sa mga katawhan. Mga karaang pagano nga mga kapistahan kadto nga may bag-ong mga ngalan nga gikuha gikan sa iglesia, o sa ubang higayon gigamit ang mga seremonya pang-Cristohanon ug gipanamastaman uban sa paganong mga seremonyas. Iyang gigamit ang pagsimba sa adlaw-nga-dios ug gihimo kini ngadto sa Anak sa Dios. Imbis nga isaulog sa Disyembre 21, diin maoy naandan nga kasaulogan sa pista sa adlaw-nga-dios, ilang gibalhin kini ngadto sa ika-25 sa Disyembre ug gitawag kini nga adlaw'ng natawhan sa Anak sa Dios. Apan nasayod kita nga Siya natawo sa Abril kon kanus-a ang kinabuhi nagasugod pagtubo, dili sa Disyembre. Ug ilang gigamit ang pista ngadto kang Astarte ug gitawag kini nga kasaulogan sa Easter diin angay saulogon sa mga Cristohanon ang pagkamatay ug pagkabanhaw sa Ginoo. Sa pagkatinuod usa kadto ka kapistahan ngadto kang Astarte.

Nagpahiluna sila ug mga altar sa simbahan. Ilang gibutangan ug mga imahin. Ilang gihatagan ang mga tawo sa kon unsay ilang gitawag nga kredo sa mga apostoles, bisan nga dili mo makita kini sa Biblia. Gikatudloan nila ang mga tawo ug pagsimba sa mga katigulangan nga nakapahimo sa Iglesia sa Romanong Katoliko nga mao ang pinakadakung iglesiang espiritista sa kalibutan. Ang matag mahugaw'ng langgam anaa nianang halwa. Ug anaa pa ang mga Protestante uban sa ilang mga organisasyon nga nagabuhat sa mao rang butang.

Nangaon sila sa mga butang nga gikahalad ngadto sa mga diosdios. Karon dili ko ginaingon nga kini gayud nagapasabot nga sila sa literal nagakaon kaniadto sa mga kalan-on nga gikahalad ngadto sa mga diosdios. Tungod kay bisan nga ang konseho sa Jerusalem nagsulti batok sa ingon niana, si Pablo wala gayud naghatag ug bili kaayo niini ingon nga nag-ingon siya nga wala ma'y pulos ang mga diosdios. Usa lamang kadto ka hilisgutang butang sa konsyensya gawas kon kini nakapandol sa mas mahuyang nga igsoon ug mao nga dili kini gitugot. Ug dugang pa niini, kini nga Pinadayag adunay kalabutan sa mga Gentil ug dili sa mga Judeo maingon man nga kini mga Gentil nga kaiglesiahan. Makita ko kini diha sa mao rang kahayag nga akong makita ang mga pulong sa Ginoo, "Gawas kon kamo mokaon sa Akong unod ug moinum sa Akong dugo wala kamo'y kinabuhi diha kaninyo. Ang tawo dili mabuhi sa tinapay lamang kondili sa matag pulong nga nagagula sa

baba sa Dios.” Imong makita nga ang pagkaon sa pagkatinuod mao ang pag-ambit sa espirituhanong kahulugan. Mao nga sa diha nga kining mga tawo nagayukbo ngadto sa mga imahin, nagaduslit sa mga kandila, nagasaulog sa mga pistang pagano, nagapangumpisal sa ilang mga sala ngadto sa mga tawo (nga tanan niini nahisakup sa relihiyon nga iya sa yawa), mga umalambit sila kauban sa yawa ug dili iya sa Ginoo. Anaa sila sa pagsimba’g diosdios angkonon man nila kini o dili. Masulti nila ang tanan na nga ilang gusto masulti nga ang mga altar ug ang incenso maoy pagpahinumdom lamang kanila sa mga pag-ampo sa Ginoo o unsa man nga ilang gihunahuna nga kahulugan niini; ug makaingon sila nga sa dihang nagaampo sila sa atubangan sa imahin alang lamang kini sa pagpatataw; ug nga sa dihang nagapangumpisal sila ngadto sa pari, sa tinuod ngadto kini sa Dios nga ginabuhat nila kini sa ilang kasingkasing, ug sa dihang mosulti sila nga ginapasaylo na sila sa pari, kini ginabuhat lamang niya diha sa Ngalan sa Ginoo; masulti na nila ang gusto nilang masulti apan sila nagaambit na sa giila nang maka-Babilonia, maka-Satanas nga relihiyon ug gihilambigit ang ilang kaugalingon ngadto sa mga diosdios ug nanaghimo ug espirituhanong pagpakighilawas, nga nagkahulugan ug kamatayon. Mga patay na sila.

Busa gingminyong ang simbahan ug ang estado. Ang iglesia nakighiusa na uban sa mga diosdios. Tungod sa gahum sa estado nga nagapaluyo kanila nga ila nang nabati karon nga, “Miabot na ang gingharian ug ang pagbuot sa Dios gipatuman na dinhi sa ibabaw sa yuta.” Dili ikahibulong nga ang Romanong Katoliko nga Iglesia wala nagapaabot sa pagbalik ni Ginoong Jesus. Sila dili mga milenyalista. Anaa na kanila ang ilang milenyum dinhi mismo. Ang papa nagahari na karon mismo ug ang Dios nagahari pinaagi kaniya. Busa sa dihang Siya moabot na, ingon pa nila, kini kinahanglan mahitabo sa pag-abot na sa bag-ong langit ug ang yuta inandam na. Apan sayup sila. Kanang papa maoy pangulo sa mini nga iglesia, ug magkaaduna gayu’y usa ka milenyum, apan samtang nga magakahitabo na kana dili siya mahiuban niini. Mopaingon siya sa kung asa mang dapit.

ANG PAGPASIDAAN

Pinadayag 2:16, “Paghinulsol o kondili anhaon Ko ikaw sa madali, ug gubaton Ko sila pinaagi sa espada sa Akong baba.”

Unsa pa ba ang mahimo Niyang isulti? Mahimo bang dili mamatikdan sa Dios ang sala niadtong mga nagdala sa Iyang Ngalan diha sa walay kapuslanan? Adunay usa lamang ka paagi sa pagdawat sa grasya sa takna sa kasal-anan, MAGHINULSOL. Isugid nga nasayup ka. Duol sa Dios alang sa kapasayloan ug alang sa Espiritu sa Dios. Usa kini ka sugo gikan sa Dios. Ang dili pagtuman maoy kamatayon, kay Siya nagaingon, “Gubaton Ko ikaw pinaagi sa espada sa Akong baba.” Ang mapintas nga mananap nakiggubat batok sa mga balaan, apan ang Dios makiggubat batok sa mapintas nga mananap. Kadtong mga nakigbatok sa Pulong makakaplag sa umalabot nga adlaw nga ginabatok sila sa Pulong. Makuyaw nga butang ang pagtaktak gikan, o ang pagdugang ngadto sa Pulong sa Dios. Alang niadtong mga nag-usab niini, ug naghimo diha niini kay nahiuyon kini kanila, unsa man ang mamahimong katapusan nila kondili kamatayon ug pagkalaglag? Apan sa gihapon ang grasya sa Dios padayon nga nagatuaw, “Maghinulsol.” Oh, daw sa unsa katam-is ang mga pahinumdom sa paghinulsol. Wala gayud akong madala diha sa akong mga kamot, sa Imong Krus lamang ako nagakapyut. Dala ko ang akong kagul-anan. Nagahinulsol ako nga ako mao gayud kon unsa ako, ug sa kon unsay akong nabuhat. Karon kini mao ang dugo, wala na’y lain kondili ang dugo ni Jesus. Sa unsa man ang mamaingon niini? Paghinulsol, o ang espada sa kamatayon? Anaa ra kini kanimo.

*(Gikuha gikan sa Ang Kabatbatan Sa Pito Ka
Mga Kapanahunan Sa Iglesia)*

CEBUANO

©2010 VGR, ALL RIGHTS RESERVED

VOICE OF GOD RECORDINGS

P.O. Box 950, Jeffersonville, Indiana 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org